

# ADVISEVR 2.

## LA PESTE.

*par Elain*



*De*

*Bourges.*

A PARIS,

Chez DAVID DOUCEVR, Libraire  
iuré, rue Saint Iacques, au  
Mercure arresté.

M. DCVI.

AVEC PERMISSION.





A MONSEIGNEUR,  
MONSEIGNEUR DE LA  
GVELLE CONSEILLER DV  
Roy en ses Conseils d'Estat &  
Priué, & Procureur General de  
sa Majesté.

MONSEIGNEUR,  
**M** Le bruit, qui a couru de la  
peste, plus grand, que le mal,  
a desrobé quelques heures à vos gran-  
des, & serieuses occupations, pour les  
employer à procureur le salut du peu-  
ple, & prouuoir à ses necessitez. A  
vostre exemple & promotion plu-  
sieurs ont esté conuiez à rendre quel-  
que seruice au public, chascun selon  
sa vacation. Je me suis promis, que  
vous n'aurez point des-sagreable,  
A ij

qu'en ce soin commun ie roulassse mon  
tôneau. Ceste actiõ n'est point difficile,  
ni penible, ni de grande importance.  
Aussi ie n'en pretends honneur, utilité,  
ny aduantage. I'en attends plustost  
quelque contradictiõ, ou mal-veillan-  
ce, à l'exemple d'un honorable & ce-  
lebre Medecin de Paris du siecle passé,  
dont ie fais mention en ce discours, qui  
tesmoigne auoir esté maudit par les  
maistres des Estuues, pour auoir cõseillé  
de defendre leur exercice en temps de  
peste. Ie n'ay offensé personne. Ma co-  
gitation a esté seulement de seruir le  
public, quoy que mauuais garand de  
ceux, qui luy font seruice. Au lieu du-  
quel i appelle vostre sauuegarde & /  
protectiõ, dont vous auez accoustumé  
d'assister les innocens. Le subiect vous  
y semond: la bonté de vostre nature  
vous y conuie: vostre charge vous y  
oblige: Charge tres-honorable, char-

ge, qui vous est, comme hereditaire & domestique: charge digne de vous, digne de la grandeur & noblesse de vostre maison: charge qui vous en promet une plus aduantageuse, si ce siecle peut porter, que vos merites soyent reconus. Pour reuenir à mon propos, ie ne me suis proposé aucune faueur, ny cōmodité pour ce peu de traual. Ie me tiendray fort satisfaiët, s'il peut apporter à mes concitoyens quelque cōseil ou consolation: Sinon ils le receuront pour tesmoignage de ma bonne volōté. Le comble de mon contentement sera, si ie puis estre asseuré, que vous me vouliez tousiours tenir pour ce, à quoy vous auez des long tēps obligé,

MONSEIGNEUR,

Vostre tres-humble & tres-affectionné seruiteur.

ELLAIN.

A Paris ce xij. de Iuillet, l'an 1606.

A iij



## ADVIS SVR LA PESTE.

**L**E bruit, qui court de la peste, plus grand iusques à present, que le mal, a donné à beaucoup de personnes grand estonnement. Ce que l'on doit soigneusement cuitier, & principalement en toutes constitutions pestilentes: pour ce que les afflictions de l'ame troublent le sang, espuisent & consomment les esprits de façon, que ceste force diuine, qui gouuerne les humeurs, s'affoiblist, eux ne pouuans plus estre regis, & comme abandonnez de leur gouuernante, se corrompent, & acquierent vne mauuaise qualité.

Comme il n'est pas raisonnable d'espouuanter le peuple sans subiect, & luy donner des frayeurs Paniques, aussi ne le faut il pas si legerement asseurer, que souz vne confiance mal fondee il se laisse surprendre au mal. Il est bon

d'vser de prouuoyance, l'aduertir doucement du mal, qui le menace, par mesme moyen luy donner des preceptes politiques, & remedes salutaires, pour se conseruer, & preseruer d'vne maladie si funeste.

C'est vn bel œuvre de guarir les malades, mais il est beaucoup plus excellent & plus certain de conseruer les sains, & les garantir de maladies: comme il est plus honorable & plus seur au pilote & patron de nauire de surinôter toutes les mauuaises rencontres de la mer, & cōduire sa charge à bō port, que de se sauuer sur vn ais apres que son vaisseau auroit esté fracassé par la tempeste.

L'Eschole de medecine de Paris a esleué de beaux esprits: Il y en a encores aujourd'huy de cōparables à ces grāds Philosophes & Medecins, qui par leur prouuoyance & suffisance ont quelque fois preserué leurs contrées de ceste calamité. Vray-est, que, si Hippocrates, Empedocles, Acrō l'Agrigentain, & autres leur semblables viuoyent au iourd'huy, ils se trouueroient fort empeschés de faire ce, pourquoy ils ont esté en leurs siecles tāt honorés. Si ne faut-il pas laisser

pas laisser d'exciter par tous moyēs ces excellens personnages, dōt cest' Eschole est assez bien fournie, à ce qu'ils nous aydēt de leurs bons cōseils, pour retrācher les causes de ce mal commun. I'ay mis la main à ce petit discours, afin de conuier quelqu'vn d'entre eux à nous donner vn meilleur aduis & plus poli, pour le bien & soulagemēt de nos concitoyens:

Ce pendant, nous examinerons les causes, & les signes de la peste, afin que par leur cognoissance nous puissiōs remarquer l'origine de celle, qui court à Paris, & y opposer quelques remedes, qui nous en puissent preseruer.

La peste est vne maladie fort courte; populaire, contagieuse, accompagnee de mauuais accidens, & de laquelle plusieurs meurent.

Les Theologiens rapportent la cause de la peste à nos pechez, pour lesquels chastier Dieu se sert quelquefois de cest instrument, quant il void en nous vn endurcissement de cœur, que nous cōtinuons à outre-passer ses saincts cōmandemens au mespris de sa parole; & des Pasteurs, qu'il nous donne pour

nous enseigner : comme nous en auons assez de tesmoignages par la sainte Es-  
criture. En ce cas le souuerain remede  
seroit de nous recognoistre, nous a-  
mander, & avec confession, regret, &  
desplaisir de nos fautes auoir recours à  
la bonté & misericorde de Dieu, le sup-  
plier de nous pardonner, & de retirer de  
dessus nous la pesanteur de sa main, &  
la iuste punitiō de nos offenses. Ce que  
nous Chrestiens assisitez de la vraye lu-  
miere deuōs faire d'autāt plus soigneu-  
sement, que les Payens en leurs tene-  
bres ont vsé souuent de ce mesme re-  
mede enuers leurs faux Dieux, quand  
ils ont esté trauaillez de pareilles affli-  
ctions: & cependant pour la precaution  
& guarison de ce mal vser des moyens,  
que Dieu nous a donné, & du conseil  
de ceux, que sa bonté a ordonné pour  
ce ministere.

Pour autant que Dieu Createur de  
tout le monde a establi vn fort bel or-  
dre, par lequel toutes les choses naturel-  
les sont tellement liees, & enchainées,  
qu'elles dependent les vnes des autres,  
& que l'on en peut remarquer quelques  
causes manifestes, laissant à part ce, qui



est occulte, & surnaturel, nous nous ar-  
resterons seulement aux causes secon-  
des & naturelles de la peste remarquées  
par les Medecins.

Les causes de la peste sont internes, ou  
externes. Les internes sont la chaleur  
pourrissante ennemie de la naturelle, &  
vne matiere pourrie & veneneuse, qui  
apporte vne grande confusion, pertur-  
bation & corruption de tous les hu-  
meurs, & engendre vne pourriture au  
plus haut degré, qu'elle puisse estre, &  
qui surmonte toutes autres especes de  
pourriture. Les causes externes sont la  
corruption de l'air, & la contagion.

Nous auons maintenât à considerer,  
quelle est la cause de la peste, qui est à  
Paris, & à rechercher les moyens de  
s'en preseruer.

Les maladies & leurs causes se reco-  
gnoissent par leur signes diagnostiques  
& se preuoyent par les prognostiques.

La peste, qui vient de causes internes,  
comme aussi celle, qui vient des exter-  
nes, se fait bien recognoistre par ses si-  
gnes, que l'on appelle *comitantia*, qui  
sont les accidés propres, qui accompa-  
gnent la maladie, comme sont les char-

bons, & tumeurs, qui viennent sous les oreilles, aux aisselles, & aux aines. Mais ie ne pense pas, que celle, qui vient des causes internes se puisse preuoir, ny que mesmement on puisse dire, que cestuy-cy, ou cestuy-la puisse estre disposé à receuoir ceste maladie par contagion, ou autrement, combien que les Medecins en general puissent dire, que certaines conditions, certains aages, certains sexes, & temperamens en puissent estre plus ou moins susceptibles,

Ceste grande & insigne pourriture conceüe & engendree dans les corps ne se peut pas, à mon aduis, aisément preuoir ny predire, ny recognoistre, que par l'euenement: on peut accommoder aux corps ainsi disposez le mot François, qui dict,

*Que celuy pense estre bien sain,  
Qui porte la mort en son sein.*

Entre les maladies pestilentes, qui viennent des causes externes, celle, que l'on dit proceder des malignes constellations, ne se peut preuoir, ny cognoistre, que par le seul euenement, comme nous tesmoigne vn excellent Medecin de ce siecle, l'vne des belles lumieres de

l'escholle de Paris , qui ne recognoist autre cause de la pure & simple peste, que la coniunction des planettes mal-faisantes. Toutesfois il aduoüe, que la parfaite cognoissance de ceste science secreete est excellente pour la prediction, & precaution & guarison de ceste maladie.

Celle, qui vient des autres causes externes, & recogneue pestilente par l'aduis des medecins , peut estre preueüe par bonnes cōiectures, & preuenue par preseruatifs accommodez à la cause de la maladie: comme elle a iadis esté preueüe, predite, & destournee par la prudence des grâds Philosophes & medecins cy deuant nommez.

Nous auons dit, que la peste, de quelque cause, qu'elle vienne, est recogneue par ses signes, & propres accidens, qui l'accompagnent. Celle, qui vient de la corruption de l'air, ou de la contagion, a souuent quelques signes auant-cou-reurs, par lesquels on peut estre aduertit de sa venue: Entre lesquels on compte les conionctions des planettes mal-faisantes, les estoilles, que l'on n'a point accoustumé de voir, les cometes, les

grandes eclypses, les tremblemens de terre, l'an de biffexte, la peste, qui afflige les contrees voisines, & autres semblables, chacun desquels signes à part ne fait que des cōiectures bien legeres, & tous ensemble n'apportent aucune necessité : si toutesfois nous en exceptons deux ; Sçauoir est la mauuaise constellation, que l'on a obserué faire vn grand degast: & la peste aux regions voisines qui vray semblablement peut apporter grand mal par contagion.

Examinons maintenant tous ces signes auant-coureurs, & essayons de recognoistre, si nous pouuons apprendre, que la corruption de l'air soit cause de la peste, qui est à Paris.

Les Philosophes ont remarqué quelques conionctions malignes, qu'ils ont dict estre causes & signes de la peste. Nos Astrologues ne remarquent point en ceste annee, ny es prochainement precedentes aucune mauuaise constellation, qui nous menace de ceste maladie. Et de faict celles, que l'on pretend estre venues apres ces malignes conionctions, ont apporté vne si grande mortalité, que la plus grande part du

monde en mourust : comme celles, qui furent du temps des Empereurs Vespasianus, & Commodus : celle, qui en l'an 1348. affligea le monde tellement, qu'il en diminua de moitié, & de laquelle on dict la cause auoir esté la disposition d'une certaine conionction des trois corps superieurs, Saturne, Iupiter, & Mars, en l'an 1345. & celle, qui fust du temps de nos ayeuls en l'an 1450. laquelle ayant commencé en Asie, & coulé en Italie par la Sclauonie & Dalmatie, & en France & en Espagne par l'Allemagne, fust si funeste, qu'à grande peine la troisieme partie du monde en peut eschapper. Ceste cy, dont on parle à Paris, n'approche aucunement de celles la, graces à Dieu, & le supplie qu'il luy plaise nous en preseruer.

On ne dit point, qu'il y ait en ceste annee en nostre hemisphere aucune estoille non encores veuë depuis celle, qui fust remarquee l'an 1572. dont on a tant escrit, & laquelle fust suiuiue d'une grande peste, qui commença à Trente enuiron l'an 1574. & se coula les annees suiuanes à Venise, à Padouë & autres

lieux voisins. La France ne fust point affligée au tēps de ceste nouuelle estoile, de ceste maladie, mais d'une fureur populaire, qu'on a estimé aussi d'ange-reuse, que la peste, & qui a trainé après soy beaucoup de mauuais accidens.

On a remarqué vne Comete au mois d'Auril dernier passé.

Aussi auons nous veu en l'année dernière trois Eclipses, deux de la Lune, & la tierce grande du Soleil, que ie ne pense pas estre cause ny signe de la maladie, qui court à present, parce qu'elle seroit plus violente & commune à tout nostre Hemisphere, comme celles, qui ont esté cy deuant remarquées.

Les tremblemens de terre sont quelquefois suivis de peste, pource que les mauuaises exhalations, qui sortent de la terre, apportent à l'air vne grande corruption: cōme il aduint en la ville de Pompei au Royaume de Naples, en laquelle vn troupeau de six cens brebis mourust infecté des vapeurs pestilentes, qui s'esleuerent apres vn grand tremblement de terre: Et eust ceste peste passé plus outre, & perdu beaucoup d'hommes, si ceste vapeur pestilente

lente eust esté plus forte, & si elle n'eust point esté corrigee & vaincue par la bôté, & pureté de l'air du pays. Or n'auons nous point eu de tremblement de terre: Aussi la Frá ce ny est point subiet- te graces à Dieu, non plus que l'Egy- pte, à cause de la froideur ordinaire, qui domine en l'vne, & de la chaleur continuelle, qui est en l'autre.

Quant à ce qu'on diét, que l'an Bis- sextil estvn des signes de la peste, en ce- ste annee nous n'auons point de Bis- sexte: Aussi ne puis ie croire, qu'vn iour adiousté au mois de Feurier de quatre en quatre ans, pour reduire no- stre annee au vray cours du Soleil, soit cause, ou signe de la peste; encores qu'vn grand Medecin de ce temps ait compté le Bissexte entre les signes a- uât-coueurs de ceste maladie. Je vou- drois qu'on m'en eust appris quelque raison: & ne pense pas, qu'on voulust prendrevn mauuais presage de l'an Bis- sextil sur le mot François corrompu, qu'on diét, qu'il y à du Bissetre, quand on veut signifier quelque desastre ou malheur. Ce qui à paraenture esté ti- ré de la superstition des Romains, qui

pensoient, que le Bissexte fust mal-heureux à leur Republique. Et pource l'Empereur Valentinian ne sortoit point en public le iour du Bissexte, fuyant ce iour là, comme mal-encontreux.

La peste, qui afflige les contrées voisines, est avecques raison cōptee entre les signes avant-coureurs de la peste, pour ce qu'elle peut estre facilement communiquee par le commerce, que nous auons avecques elles : & que les modernes ont escrit, qu'au temps mesmes, que l'air est corrompu, il en meurt plus par la contagion, que par l'infection de l'air.

On peut icy adiouster deux autres signes entre les avant-coureurs de la peste, qui vient de la corruption de l'air.

L'vn est tiré d'un ancien, qui dict, que c'est vn grand signe de peste, quand les loups portent grand dommage aux hommes. De là on pourroit tirer vne coniecture qu'à plus forte raison le grand dommage fait aux hommes par le chien animal domestique, né pour leur seruice, seroit vn presage de peste, ou de quelque autre sinistre euenement.



Or dit-on, que l'on n'a iamais tant ouy parler des chiens enragez, que depuis deux ou trois ans en ça, qui ont offensé plusieurs personnes en ceste ville, & porté grande nuisance au bestail de quelques contrees voisines. A quoy ie responds, que le chien deuiant enragé le plus souuent au temps de la Canicule, & que ceux, que l'on a tenu pour eniugez par ces dernieres années, n'estoient pas tant signes de la peste, que d'un excez de chaleur & secheresse en l'air, desquelles ceste-cy resiste puissamment a toute pourriture. Ioinct que ce mal leur vient par leur propre intemperature, & malice d'humeurs, qui s'engendrent en leurs corps, ou pour auoir vſé de viandes salees, ou pour les auoir empesché de boire apres vn grand travail, ou par quelque autre semblable excez plustost, que par l'indisposition de l'air.

L'autre signe est pris de l'indisposition des saisons, que nous recognoissons ne garder aucunement leurs constitutions naturelles. L'adiouſte d'auantage, que non seulement les saisons sont fort desreglees, mais aussi que les iours

font merueilleusement inconstans & inegaux. Ce qui nous menace de maladies mal reglees, subiectes à rencheutes, accompaignees de mauuais accidens, & dont les issuës son fascheuses, douteuses, & souuent funestes. Mais ces inegalitez de saisons ne sont pas tousiours causes, ny signes certains & necessaires de la corruption pestilente de l'air. *Quia non semper habent, τὸ θερμὸν πολέμιον, καὶ κτεῖνον σπυρονοῶδες, in quo est regnum pestilentiae*, comme disoit l'Hippocrat François, l'honneur de nostre siecle, & l'vne des perles pretieuses de la riche mostre de l'eschole de paris. Nous voyôs souuent en France les anneés exemptes de peste par la grace de Dieu, & toutesfois leurs saisons fort desreglees en leurs réperatures: ce que nous ressentôs manifestemēt par leurs qualitez inconstantes & inegales, & encores par le dommage des fruiçts, qui aduancez par la bonté & chaude temperature du temps, si par apres ils se trouuent surpris de froid, sont bruslez, bruinez, perdus, ou dessaisonnez: Peste certainement de fruiçts, mais qui

ne va pas souuent aux hommes.

Les anciens Medecins nous ont donné vn certain moyen, pour cognoistre, si la peste vient de la corruptiō de l'air, c'est à sçauoir quand vne grande partie du peuple est affligee d'une mesme sorte de maladie accompagnee de ses propres signes, que nous auons specifié cy deuant. Car puis que la cause est tres-commune, il faut que les effects soyent tres-communs. Quand la peste vient de la corruptiō de l'air, elle se communique indifferemmēt à toutes regions, à toutes personnes de quelque condition, qu'elles soyent, à tous aages, à tous sexes, & à toutes sortes de temperatures: comme celles dont nous auons parlé cy deuant qui furent du temps de l'Empereur Commodus, en l'an mil trois cens quarante & huiēt, & en l'an mil quatre cens cinquante. Apollonius le Tyaneē aduertist les Ephesiens, qu'ils seroient trauaillez de la peste. Il fonda sa prediction non point sur le desfreiglement des saisons, mais sur ce, que luy, qui estoit bien né, bien reiglé en sa maniere de viure, & qui ne faisoit aucun excez, estoit neantmoins

malade: & partant il iugea que la corruption de l'air estoit cause de son indisposition. Les saisons de l'an 1580. semblerent assez bien reglees, l'Esté fut fort sec, qualité propre pour empêcher la pourriture, & neantmoins on peut rapporter la cause de la peste, qui courust lors a la corruption de l'air, pource que ceste peste fut grande, affligea beaucoup de peuples, & qu'elle vint a la suite d'une Coqueluche, dont peu de personnes se peurent garentir. Ceux qui estoient malades de la Coqueluche, auoyent une petite fièvre, reume, mal de teste, mal de cœur, grand degoustement, & guarissoient tous par la bonté de nature, qui leur excitoit une petite sueur, ou moiteur. Ceste maladie populaire, & toutesfois salutaire, qui venoit plustost de quelque indisposition ou alteration de l'air, que de corruption, fust tost apres suivie d'une pestilente, qui assailloit le peuple avec les mesmes accidens, mais faisoit incontinent cognoistre sa malignité par ses propres signes cy devant specifiez, & par la mortalité, qui fut si grande, qu'il en mouroit beaucoup plus, qu'il n'en

eschappoit. Durant ceste peste il n'y auoit autre maladie à Paris, & si dauanture il s'en trouuoit quelque autre, comme fièvre tierce, ou double tierce, elle se tournoit incontinent en peste: Signe remarqué par les Medecins qu'il y auoit corruption de l'air.

Nous voyons iusques icy en ceste ville d'autres maladies, que des pestilentes. On voit des eresypeles, des fièvres tierces, des diaires avec bubons, qui ont fait quelquefois abandonner les malades, qui se sont trouuez guaris au bout de quarante heures, ou enuiron.

Si la corruption de l'air n'est point cause de la peste, qui est à Paris, il nous en faut rechercher vne autre.

I'ay dit cy deuant, qu'une cause trescommune engendre des maladies trescommunes. Il est donc vray semblable, qu'un effect moins commun depend d'une cause moins commune.

Nous disons, que les venins se peuvent engendrer dās les corps humains, cōme l'humeur malin, qui fait les epileptiques, & celuy, qui fait les passions hystériques. Par mesme raison ceste

grande pourriture, qui apporte les maladies pestilentes moins communes, peut estre engendree en certains corps plustost, qu'es autres, selon qu'ils sont disposez, & dōt on peut apporter quelque autre cause externe moins commune, que l'indisposition de l'air.

Vne mauuaise maniere de viure, cōmune à quelques pauvres gēs, peut exciter vne maladie pestilente premiere-ment commune à ceux, qui ont ainsi vescu, & qui puis apres par contagion se communique aux autres. Cela nous est tesmoigné par les anciens Medecins. En l'an 1590. nous auōs veu ceux, qui auoient pendant le siege mangé du pain d'auoine, & ie ne sçay quelle es-  
 pece de bouillie, malades de lāgueur avec enfleure de iambes & de cuisse, & quelquesfois de tout le corps. Ceste maladie n'estoit point contagieuse, ains seulement commune à ceux, qui auoient esté contraincts de s'aider de ces mauuaises viandes. Hippocrates remarque quelques incommoditez semblables aduenuēs en la ville d'Aeno en Thrace, pource que le peuple en vne grande charté de viures auoit vescu de legu-  
 mes,

mes, & d'un petit grain, qu'on appelle  
des ers.

Non seulement les historiens, mais  
aussi les medecins, comme Galenus, &  
Auenzoar, nous tesmoignent, que les  
maladies pestilentes n'ont eu quelque  
fois autre cause, que la cherté des vi-  
ures, a raison de quoy le pauvre peuple  
estoit contraint de se nourrir de mau-  
uaises viandes, qui engendroyent les  
humeurs malins & pestilents.

La contagion peut aussi apporter ce  
mal, qui puis apres se coule, s'acroist, &  
faict un grand degast, s'il n'y est soigneu-  
sement pourueu. Il me souuient, qu'en  
l'an 1579. un marchand estrangier venant  
d'un lieu infecté arriua en ceste ville, &  
apporta la peste en son hostellerie. Le  
cours de ce mal fust arresté par la dili-  
gence des Magistrats Politiques, &  
couua tout l'hyuer : Mais le vent de  
midy venant des regions infectées, qui  
souffla tout l'esté suiuant, nous appor-  
ta vne telle corruption, qu'elle surmō-  
ta quasi le soin, la diligence & l'indu-  
strie desdits Magistrats Politiques,  
gens de bien & d'honneur, & amateurs  
du bien public.

Ceux, qui iusques à present, ont esté affligez de ceste maladie, sont pour la plus grande part, pauures gens. Iusques icy on remarque peu de personnes qualifiees affligees de ce mal. Il y a deux ans, que ie recherchay curieusement quelques causes moins communes de ce mal, qui estoit a Paris moins commun, & entre autres apris, qu'en vn quartier de ceste ville ce mal commença par l'indisposition d'un homme, dont on dict la cause auoir esté vne frayeur, ou vne mauuaise exhalation, qu'il receut par vne ouuerture de terre. On ne parloit encores alors quasi point de peste. Mais elle se fist cognoistre par les effects: car incontinant apres le decez de cest homme la maladie pestilente se communiqua par contagion au voisinage, qui auparauant estoit sain. Or est-il certain, que ceste maladie viét aucunesfois de frayeur, aucunesfois des mauuaises exhalatiós de la terre, comme nous auons dict de la ville de Pompei: comme aussi on trouue par escrit, que les oyseaux, qui passoyent par dessus le Golfe d'Auerno au Royaume de Naples, mouroyent, & que la peste e-



stoit fouuent és lieux voisins, à cause de la puanteur, qui sortoit de ce golfe. Cela me confirma en l'opinion, que j'auois lors, que ceste maladie ne venoit point d'vne cause tres-cōmune, comme de l'air, mais d'vne moins cōmune, cōme peuuent estre celles, que ie viens de dire, la mauuaise nourriture cōmune aux pauvres gens, & la communication de commerce, qui se peut faire entre particuliers, & autres semblables.

Ce qui me fist esperer & iuger, que le mal ne passeroit point plus auant, moyennant la grace de Dieu: & le succes fust tel, que nous esperions. Les mesmes raisons me font esperer le semblable par la bonté de Dieu, moyennant le bon ordre, que Messieurs de la police apporteroyent à desraciner la cause du mal, & ce qui le foment.

Toutes choses bien pesees & considerees, mon aduis est, que l'air n'a point ceste chaleur, ennemie de la naturelle, & pourriture meurtriere, qui puisse estre cause de la peste, qui court à Paris. Et neanmoins ie ne voudrois pas, que le peuple sur cest' assurance s'endormist, & se rendist nonchalant

aux remedes, qui luy sont necessaires pour la precaution. Car il peut aduenir, que l'air, qui se pourra eschauffer à la leuee de la Canicule, trouuant des corps mal disposez de soy, ou autrement, comme par contagion, participeroit à ceste corruption, & encores avec plus de facilité, s'il aduenoit, qu'il ne fust esuenté, & purifié par le vent salutaire, tel, qu'est le vêt Grec, que nous appellons Nor-est, & en ce temps-là Etesien. Encores seroit-il à craindre, que les vents des prouinces infectees ne communiquassent à nostre air leur corruption: comme si le Sud-ouëst, appelé par les Latins Africus, continuoit longuement à souffler, il pourroit apporter ce mal, que l'on dit estre grand en Afrique: ainsi que nous auôs veu en l'an mil cinq cens quatre vingt: & que les histoires nous tesmoignent estre aduenü sous l'Empire de Commodus: & en l'an mil trois cens quarante & huit: & en l'an mil quatre cens cinquante. Ce qui me fait souuenir de ceste peste memorable si naïfvement representee par Thücydides, qui comença en Ethiopie, passant par l'Egy-

pté, par la Lybie, & par le Royaume de Perse, vint iusques en la ville d'Athenes, qui fust merueilleusement affligée:

*Nam penitus veniens, Aegypti finibus ortus,  
Aëra permensus multum, camposq; natantes  
Incubuit tandem populo Pandionis.*

C'est pourquoy sur les menaces, qui se presentent, d'un mal si pernicieux, ie conseilerois au peuple de pouruoir à sa seureté, se munir contre tous mauuais accidens, & à ceste fin se recommander à Dieu, obeir au Magistrat, & garder soigneusement ce qui luy sera ordonné, pour la precautiō de ceste maladie, & la conseruation de sa santé.

La peste a deux considerations: l'une publique, par ce que c'est vne maladie commune: l'autre particuliere, d'autant qu'elle peut toucher particulièrement vn chascun:

*Nam tua res agitur, paries cum proximus ardet.*

Les remedes aussi, & principalement de la precaution, que nous auons dict estre plus excellente, que la guarison, dépendēt en partie des magistrats, auxquels la garde du peuple est commise,

en partie de chasque particulier, qui par raison naturelle doit auoir soin de sa conseruation.

Ie voudrois, que chascū recogneust, combien nous sommes obligez à ce grand Parlement, a cest auguste & souverain Senat, *Reipublicæ custodi, præsidi, propugnatori, salutis mentisque publicæ principii* : & nommément au chef venerable de cest' illustre compagnie, qui avec tant de dignité, & d'integrité non seulement administre la iustice, mais aussi avec vn soin indicible procure le salut public, s'enquiert curieusement des signes, des causes, precaution & curatiō de la maladie, & prouuoit aux necessitez du peuple.

Messieurs de la Police, qui sous l'autorité de la Cour vous acquittez si soigneusement de la charge, qui vous est commise, ie vous supplie de donner ceste licence à l'ordre de mon discours, que ie puisse représenter quelques regles dependantes de vos offices, & grâdemment importantes à la precautiō, & guarison de ceste maladie, & à l'amortissement des flammesches, qui couues sous des cendres trompeuses entre-

tiennent le feu, & quelquefois le rallument:encores que iereconnoisse franchement icelles regles auoir esté iadis non seulement proposees, mais aussi ordonnees, & en partie executees, en partie aussi demeutees sans execution, pour les difficultés, qui se trouuent en ceste grâde ville, & en vn tel siecle, que cestuy cy.

Il seroit necessaire d'auoir deux maisons en deux fauxbourgs de la ville, es lieux cōmodes, choisis par l'aduis des Medecins, pour retirer les pauures malades de la peste. Il est trop desaduantageux à la santé publique, que les pauures malades soyent logez au grand hostel-Dieu assis pres la grande Eglise, au milieu de la ville, d'où il faut transporter ceux, qui sont decedez, par ladicte ville au cimiterie de la Trinité. La ville de Paris est naturellement saine, tant pour estre bien descouuerte, & purifiée de vents, que pour l'assiette du lieu sec & sablonneus, & la commodité de ceste belle riuiera de Seine, qui passe a trauers, & emporte toutes ses ordures & immondices: & seroit beaucoup plus saine, si on auoit prouueu a la mul-

titude des pauvres, & à la retraicte des  
 malades de la contagion. Ce soin est  
 digne de vos charges, Messieurs : vous  
 impetrerés aisément ceste permission  
 de sa Majesté tres-Chrestienne, & de  
 nos seigneurs de la Cour. Preuenés la  
 diligence & l'industrie de vos succes-  
 seurs, & la gloire, qu'ils auront de ren-  
 dre cest' habitation aussi salubre, com-  
 me la ville est grande, opulente, & l'une  
 des plus florissantes de la Chrestienté.  
 Je sçay bien, qu'il ne tient ny à vous, ny  
 à vos predecesseurs, que cela n'ait esté  
 executé, & qu'il y a faute d'un instru-  
 ment, qui est nécessaire à toutes bon-  
 nes entreprises. Mais il est croyable,  
 qu'il y a en ceste ville un bon nombre  
 de gens de bien, qui fort volontiers cō-  
 tribueront à vne œuvre si charitable, à  
 l'exemple de quelques autres villes de  
 ce Royaume beaucoup moindres, que  
 ceste-cy. Et croy, qu'il y a vne certaine  
 nature de deniers, qui pourroit estre le-  
 gitimement employée à ce dessein, ou  
 aux necessitez de l'hostel dieu. En tou-  
 tes belles entreprises on trouue ordi-  
 nairement quelque empeschement. En  
 ceste cy il faut surmonter toutes les dif-  
 ficultez,

ficultez, puis qu'il y va du salut cōmun:  
*Salus populi:suprema lex esto.* I'en demeure  
 la, afin de ne passer point mes riuets.

Puis que nous sommes sur les termes  
 de l'hostel Dieu, ie supplie Messieurs les  
 gouuerneurs de receuoir en bōne part  
 vne proposition, que ie pense estre fort  
 à propos. Il seroit souhaitable, qu'il y  
 eust dans l'hostel-dieu vn apoticaire, &  
 vne petite boutique garnie de drogues  
 & compositions necessaires pour les  
 pauures malades: comme i'ay ouy di-  
 re, qu'autrefois il y a eu. L'apoticaire se-  
 roit tenu de rendre compte tous les  
 mois à mesdits sieurs les gouuerneurs  
 de ce qu'il auroit employé, & à ceste  
 fin rapporter les ordonnances signees  
 du Medecin: qui seroit choisi, vacation  
 aduenāt, par mesdits sieurs les gouuer-  
 neurs, sans aucune brigue, ny faueur, le  
 plus propre a ceste charge. Ce que ie  
 dis, pour ce que i'ay entendu de l'vn de  
 mesdits sieurs, que quelques vns y veu-  
 lent entrer par brigues: Dont i'ay esté  
 fort estonné, ne me pouuant persua-  
 der, sous correction, qu'en ceste hon-  
 neste compagnie de Medecins de Pa-  
 ris il y eust aucun, qui voulust y entrer.

par telles voyes , pour ce qu'il faut, qu'un Medecin soit legitimement appelle. Quiconque s'y gouverne autrement, faict grand preiudice à son ordre, & à la dignité de sa profession. Il y a maintenant un fort honneste homme, & qui a toutes les parties requises dependantes de soy pour faire ceste charge. Mais pour s'en acquiter parfaitement, il doit estre tellement authorisé desdits sieurs gouverneurs , qu'il soit obeï des officiers de la santé, pour ce que c'est à luy d'ordonner ce qui est de la Pharmacie, chirurgie, & maniere de viure. Ayant ceste autorité il rapportera une autre grande commodité à la maison: que i'ay veu practiquer, il y a environ trente cinq ans par un tres-honneste & sçauant medecin, qui auoit ceste charge: Il doit autant de fois, qu'il visite les malades, mener avec soy le portier, ou autre officier de la maison, & luy commâder de chasser les gueus, qui se portent bien, & se vont seulement ietter là dedans pour manger le pain des pauures malades. Le public peut encores receuoir du Medecin une grande vtilité ! C'est à sçauoir, que les ba-



cheliens en Medecine le puissent accompagner en la visitation des malades, pour apprédre la pratique de la Theorique, qu'ils ont appris aux Escholes, à la charge neaumoins, que le Medecin ordonnera, & non autre, & signera ses ordonnances suivant l'Arrest de la Cour. Ce que i'ay dit de l'apoticaire & boutique, ne vient de moy. Monseigneur le premier Presidēt, qui a grand soin de ceste maison, comme de tout ce qui est public, m'a, long temps a, commandé de chercher vn apoticaire à ceste fin. Ils s'en sont presentez quelques vns, mais ayant recognu, qu'ils n'auoyent pas toutes les parties requises pour ceste charge, i'aymay mieux m'en deporter. Le sçay, qu'il sera malaisé de le trouuer tel, qu'on desire: mais encōres se peut il rencontrer. Reuenōs à nostre premier propos.

Que les pāures malades de peste ainsi logez soyent bien & soigneusement traictēz par charité Chrestienne, secourus de bons Medecins, de bons chirurgiens, & de drogues d'apoticaire necessaires: La maladie est grāde, difficile à traicter, en laquelle il faut appor-

ter beaucoup de considerations : Les plus excellens Medecins & chirurgiës n'y font pas trop bons. Et neaumoins on sçait, que le plus souuent on y met des apprentis en chirurgie. Je croy, que pour le iourd'huy il y a d'honnestes gens, qui en ont le soin: Mais par le passé on y a mis des gens, qui estoient plus à craindre, que la peste mesme, pour ce qu'ils estoient fort ignorans & entrez pour gagner seulement leurs maistrises sans chef d'œuvre. Nous deuons sçauoir bon gré aux maistres Barbiers chirurgiens iurez de Paris, qui se cotiserent, il y a deux ans, en vne pareille necessité, pour y employer quelques vns de leur compagnie, afin de fermer la porte de leur maistrise à ces ignoras. Pentens, qu'ils auoyent entre-eux vne police telle, que les quatre derniers maistres receus seroyent tenus de traiter les malades de peste. Je croy, qu'il n'est pas raisonnable d'y contraindre personne, ains plüstoit en choisir quelque bon nombre des plus experimentez, avec deux bös Medecins, & les exciter par quelque honorable & vtile reconnaissance. On pense, que jadis à

Rome les Medecins visitoyent les malades de peste, leurs manioyēt le poux, leurs ordonnoyent ce, qui estoit necessaire, sans crainte, sans souspeçon, & sans danger. Nous trouuons par experience, que le danger y est grand, & que la contagion faict vn merueilleux degast, & n'espargne point les medecins, non plus, que les autres.

--- *In ipsos seua medentes*

*Erumpit clades, obsuntque authoribus artes.*

Mal-aisément trouuerēs-vous auourd'huy des malmedis, qui gratuitement s'exposent à ce hasart. Il faut donc cō- uier quelques bons medecins & chirurgiens, par les moyens, que ie viens de dire: Cela se practique par tout ailleurs.

Ceux, qui visitent ou assistēt les malades, soyent habillez de camelot, sarge d'Arras, taffetas, ou d'autres semblables estoifes; Et ceux, qui n'auront le moyen, se vestirōt de marroquin, de treillis d'Alemagne, ou autre belle toile noire.

Ceux, qui ont commodité de se faire traicter en leurs maisons, soyent fournis de Medecins, de chirurgiens,

de gardes, de viures, & autres choses necessaires, sans, que ceux, qui les assistent, ayent aucun cōmerce avec leurs voisins.

Ceux, qui eschapperont, soyent releguez pour vn temps, en quelques lieux salubres, auāt que retourner avec le peuple, & qu'ils soyent vestus d'habits neufs, sans qu'ils rapportent aucune chose subiette à recevoir mauuais air, dont ils se soyent seruis pendant leurs maladies.

Quelques bons medecins de ceste ville ont escript, que les vinaigriers brulent les lies trop pres de la ville, dans laquelle il en vient vne fumee malfaisante.

Ils ont aussi remarqué, qu'il vient vne mauuaise senteur des conroyeurs, qui toutefois sont logez au milieu de la ville. On leur pourroit donner quelque departement sur la Riuiere, comme vos predecesseurs y ont colloqué la bouscherie, l'Escorcherie, & depuis quelques annees le marché neuf. Il est certain, que quād la peste se met en ces matieres grasses, gluantes, & visqueuses, elle est fort dangereuse, & conta-

gieuse. Il me souuient, que l'an 1580. elle fust en vne maison d'un chandelier, en laquelle il y auoit beaucoup de locataires, qui presque tous en moururent.

Il seroit bon de donner quelque ordre aux esgouts de la ville, pour ce qu'il en vient vne mauuaise odeur, spécialement du costé du temple & de Saint Martin, quand la Bize souffle, qui renuoye ce mauuais air dans la ville, laquelle Bize, cela cessant, nous seroit salutaire. Empedocles ayant recogneu, que la peste, qui estoit en Salemi, ville de l'isle de Sicile, venoit de la puanteur d'une vilaine riuere, y apporta promptement vn remede. Car il fist destourner à ses despens l'eauë belle & claire, comme eauë de roche, des autres riuieres proches, & la fist escouler par petits ruisseaux & conduits en ceste autre riuere sale, qui rendoit ceste puâteur: De façon, que par ceste meslange d'eaües la riuere, qui estoit croupissante & mares-quageuse, fust rendüe belle, nette, courante, & perdist sa puanteur & saleté par l'abondance, & pureté des autres eaües, qui y aborderent: & auf-

fi tost la peste cessa.

Ordonner, que les commissaires des boües facent soigneusement & plus souuent enleuer les boües de chascun quartier : avec estroites defenses aux chartiers de tant emplir leus tombeaux, qu'ils en respendent par les ruës, par lesquelles ils passent. Toxares Medecin deliura la ville d'Athenes de peste, pour auoir fait oster toutes les ordures, de la ville, & commandé, que les rües & rüelles fussent arrousees de vin. Agamemnon, pendant que la peste estoit en son camp, prenoit bien la peine de visiter son armee, de faire tout nettoyer, & ietter toutes les ordures & immondices en la mer.

Que les bourgeois soyent soigneux de faire ietter de grád matin quelques seaus d'eau deuant leurs portes, & faire deualer les ordures par les ruisseaux: Et qu'à ceste fin toutes les fois, qu'on pauera les ruës, qu'o face aux ruisseaux bonnes pantes.

Que ceux, qui ont des cheuaux, facent souuent nettoyer leurs escuiries, & emporter le fien, afin qu'il croupisse moins aux maisons.

S'il

S'il y auoit moyen d'empêcher, que l'on n'apportast aucune chose en ceste ville des regions, qui sont affligées de ceste maladie, ce seroit vn grand bien pour la precaution: Mais il est mal-aisé de garder ceste police en ceste ville, qui est comme vne mere commune, & l'abregé de la France; voire quasi de toute la Chrestienté.

Mettre a fin le reestablissement des conduits vtilement cōmencé par monsieur myron, pour amener en ceste ville les eaües des fontaines, afin que le pauvre peuple puisse euitier l'vsage des mauuaises eaües. On sçait, que leur vsage a souuent apporté de grandes maladies aux armées.

Defendre les estuues en temps de peste. Vn bon Medecin & chanoine de Paris, qui est decedé dès le 3. Iour de Ianuier en l'an 1457. escrit auoir esté mal voulu des maistres des estuues, pour auoir donné ce conseil.

Faire retirer les pauvres mandians, & trouuer moyen de les loger en quelque lieu, & leur donner commodité de viure, sans les laisser courir par la ville.

Si le mal empiroit, dont Dieu nous  
 veillégarder, pour amâder la corruptiô  
 de l'air, on recommande le feu, comme  
 vn remede singulier. On dict qu'Hip-  
 pocrates par ce moyen fist cesser vne  
 grande peste, qui trauailloit les Athe-  
 niens. Empedocles, & Acron l'Agri-  
 gentin se font feruis du mesme preser-  
 uatif. Nous lisons, que les soldats se ga-  
 rentirent de la peste, qui estoit à Tour-  
 nay, mettâns de la poudre à canon sans  
 boulet dâs les pieces d'artillerie, qu'ils  
 delaſchoyent la nuict, & sur le point du  
 iour. Te ſçay que le feu est salubre en  
 toute faison, & que pour cela le petit  
 Poëte entre les autres felicitez desiroit  
*focum perennem* : Mais on y peut appor-  
 ter quelque distinction : Sur quoy il  
 faudroit demander conseil aux Mede-  
 cins, quand on voudroit vſer de ce re-  
 mede. Les regles generales ſont dange-  
 reuſes, ſpécialement ſi on les prêt crûe-  
 ment.

Auoir ſoin de faire enterrer les corps  
 morts de peste bien-auant, & en cime-  
 tieres eſloignez du cômmerce du peuple.  
 Il y eût vne peste à Carthage, qui ren-  
 gregea grandement tant à cauſe de la



puanteur des corps morts, qui gisoient sans sepulture, pource que personne n'y osoit toucher, craignant la contagion, que pour raison de la pourriture d'un marets, qui estoit proche de la ville. Il y eust pareillement à Venise vne peste, qui empira fort, pource que les corps demeuroyēt en la ville, & aux maisons sans sepulture par faute d'amballeurs, & qu'au vieil *sanita* on y brusloit les corps morts, desquels la fumee apportoit grande infection en la ville.

Defendre la vente des meubles, qui sont es maisons infectees, donner ordre, qu'ils ne soyent point desrobbez, comme on dit, qu'il furent encores, il y a deux ans, en vne maison: Et au cas, que le mal rengregeast, defendre tout a faict les inuentaires, & ventes de meubles. Cela est plus de consequence, que plusieurs n'estiment. Il a esté dit cy deuant, qu'il vient plus de mal par la contagion, que par la corruption de l'air. I'ay ouy dire à vn de mes deuanciers, que les massons, qui bastissoyēt en vne maison, qu'il auoit pres le Ponceau, moururent tous de la peste, pour auoir tiré de quelques creuasses, qui estoient

en vne chambre, de la fillace, ou des estoupes, qui estoient infectees de plus de sept ans, pour ce qu'il y auoit autāt, que la peste auoit esté à Paris. Il estoit commandé au Sacrificateur de brusler tout vestement de laine, de lin, en ordissure, en tissure de lin, ou de laine, en peau, ou en tout ouurage de pelleterie, s'il voyoit, qu'il y eust lepre poignante. A cest exemple on deuroit brusler tous les meubles, qui ont serui aux malades de la peste, & par leur porosité receu le mauuais air: tels, que ceux, qui sont cy dessus mentionnez, & autres semblables, iusques aux meubles de bois, & notamment ceux, qui seroyent trouëz ou vermoulus. Le Senat de Venise fit brusler vne grande quantité de meubles, que les emballeurs & fossoyeurs auoyent amassé pendant que la peste auoit esté en la ville, pour retrancher le fondement d'une nouvelle contagion. Ceste ordonnance fust belle, & bien executee apporta seureté au Seigneurs Venitiens. Quant aux murailles de la maison infectee, encores qu'elles soyēt froides & massiues, si est il bon de les haçher, & rendre de nouveau, specia-

lement si elles sont vieilles, caduques, ou creuassées. Ainsi estoit-il commandé au Sacrificateur de faire rendre les parois de la maison infectée de lepre.

Quant à ce qui appartient au deuoir des particuliers, ie voudrois, que chacun se rendist aussi diligent à obeir aux reglemens, que font Messieurs de la police, comme ils sont soigneux de les ordonner.

Chacun doit estre aduerti de se tenir nettement en sa maison, & autant au large, que sa cōmodité le pourra porter. Pericles fust blasmé par les Atheniens, reietans sur luy la cause de la peste, qui les affligoit, pour ce qu'il auoit amassé grand nombre de villageois, & iceux logé dans la ville. On a pensé que la grande multitude du peuple estroitement logé à Rome, y auoit apporté la peste en l'année du Consulat de L. Æbutius, & de P. Seruilius. Aussi est il bien certain, que les villes moins peuplées sont moins subiettes à la peste, qui vient, ou qui s'entretient par cōtagion.

Fuir la compagnie des malades de

peste, de ceux qui les assistent: & le maniement des choses infectées.

Quand il y a quelque indisposition en l'air, il la faut corriger par son contraire. Si le mal vient du midy, les fenestres, qui le regardent, seront fermées, & celles du Septentrion ouuertes. Si la saison est trop humide, il faut faire bon feu. Pendant que ceste grande peste, dont nous auons parlé cy deuât, estoit à Rome, l'Empereur Commodus par le cōseil de ses medecins se retira à Laurêto, où il y auoit vne forest de lauriers, tant pour le plaisir du lieu, que pour l'odeur des lauriers, que l'on tient estre propre pour empeschier la corruption: Quelques vns pour vn antidote de la peste recommandent les mauuaises odeurs, comme celle du bouc, ou de son vrine. Contre lesquels ie ne veux disputer, ny blasmer leur opinion pour le respect, que ie rends aux anciens, qui l'ont escrit, & pour l'honneur, que ie porte à la doctrine des modernes, qui ont esté de cest aduis. Mais ie les supplie aussi de ne trouuer mauuais, si en cela ie ne me range à leur opinion: & de me donner ceste liberté de dire, que les

bonnes & douces odeurs me semblent plus propres pour empescher de recevoir le mauuais air, pour ce qu'elles confortent la faculté animale & vitale, qui par ce moyen resisteront plus aisément à toute corruptiō. On portoit à la main de petites pommes de senteurs, quand la peste fust à Rome sous l'empire de Commodus, dont nous auons parlé plusieurs fois. Les anciens mettoyent l'escorce de citron parmi leurs habits pour les mieux conseruer, & les garder de pourriture. Il est bon de se tenir proprement & nettement, & se vestir d'habits, qui sont les moins subiets à recevoir le mauuais air, dont nous auons parlé cy deuant, selon la commodité & condition d'un chacun.

Le dormir soit mesuré à la nature & a la coustume d'un chacun : les veilles excessiues sont nuisibles.

Les exercices soyent moderez, & sur tout il se faut garder de se trop eschauffer, afin de n'auoir point necessité d'attirer beaucoup d'air.

Il faut eüiter toutes passions & perturbations de l'esprit, & specialement la colere, la tristesse, & la frayeur: ce que

nous auons dit au commencement de ce discours. Cōme le vin qui est exposé au Soleil pendant la canicule se tourne, & s'aigrift aisément, pour ce que la lie attirée par la grande chaleur se mesle avecques le vin : ainsi aduient il, que par la tristesse, par la frayeur, par la melancholie, ou telles autres perturbatiōs & agitations de l'ame la lie du sang sort de sa place, se mesle avec les bōnes humeurs, les trouble, les corrompt, & les dispose à ceste mauuaise pourriture. Le soyn, le souci, le chagrin doiuent estre bannis en constitution pestilente. On a remarqué, que quelques Chirurgiēs, qui sans aucun soyn visitoyēt, & secouroient gayement les malades de peste, s'en acquitoient fort bien, & sans incommodité de leur santé: & que neantmoins ceulx la mesmes estans mariez, & minez du soyn, qu'ils auoyent de leurs femmes, enfans, & affaires domestiques, à la premiere rencontre & visitation de malades se trouuoient surpris du mal, dont ils mouroyent. On dict, que les soldats Gregeois chassoyent la peste de leur camp par leurs chançons: & que Thaletas de Crete en garantist les

Lacede-

Lacedemoniens par le moyē de sa mūſique. Par cela nous entendons , que nous deuons viure doucemēt & gayement : Car par ce moyen nous pouuōs fortifier nos ames & nos corps , pour plus aiſément reſiſter à ceſte maladie.

Des plaiſirs Veneriens ie diray ſeulement , que ie prie le lecteur de ſe ſouuenir de la reſponſe , qui fuſt faite a celui , qui demandoit quand il falloit chercher la compagnie des femmes, toutes & quantes-fois, que tu voudras t'afſoiblir. Or tout noſtre but icy doit eſtre la conſeruation des forces.

Chacun ſe doit regler en ſa maniere de viure, vſer de bonnes viandes, aiſces à digerer , & fuir tout excez tant en quantité, qu'en qualité , & principalement l'vſage des fruiets nouueaux, qui engendrent mauuais ſuc , qui ne ſont point de garde , qui incontinant ſe gaſtent, & ſ'entichent, appelez proprement par les Latins *fugaces* : I'excepte les ceriſes, dont l'vſage moderé eſt fort ſain.

Comme il eſt bon de ſe tenir proprement & nettement en ſa maiſon , & en ſes habits, ainſi eſt-il bien neceſſaire de

tenir son corps au dedans pur & net: partant ceux, qui sont subiects à quelques infirmités, & qui amassent quelques mauuaises humeurs, seront soigneux de se tenir le ventre bon, & de se purger par medicamens doux & gracieux, qui leurs seront ordonnez par leurs medecins ordinaires.

Mais pour ce que i'entends, que l'on desire, quelques remedes preseruatifs pour les pauures, qui seront tousiours bien & charitablement receus par les Medecins de ceste ville, quand ils les voudront consulter, i'adiousteray icy quelques medicamens aisez a preparer & de peu de frais, dont ils se pourront aider pour la precaution.

Il faut donc, comme nous venons de dire, que chascun soit soigneux de se tenir le corps net, pur, & perspirable. Ceux; qui mangēt beaucoup, qui font beaucoup de sang, qui ont le foye chauld, se feront tirer iusques a neuf ou dix onces de sang: Ils se purgerōt deux ou trois fois le mois de medicamens doux, comme par exemple en temps pluuieux, & tel que nous l'auōs eu quasi iusques a present, ils vseront des pilu-



les fuiuantes:

*℞. pilularum Ruffi. ʒ. s. Malaxa cum  
Syrupo conseruationis citri : fac pilulas iij. Da  
manè paulò ante iusculum.*

Autrement, & en saison plus chaude  
& seche ils vseront de ce medicament,

*℞. foliorum sennæ mundatorum. ʒ. s. In-  
fūde & coque in decocto pectorali. In colatu-  
ra dissolue Catholici duplicati, & Syrupi rosa-  
rum pallidarum laxatiui Veteris an. ʒ. i. fac  
dosim. da tribus horis ante iusculum.*

Au lieu de cela pour plus grande fa-  
cilité, & a moindres frais, ils pourront  
prendre vne demi once de Senné, & la  
faire tremper & bouillir quelque temps  
dans vn bouillon, ou dans vn ius de  
pruneaux, le passer par vn linge net, &  
le prendre deux ou trois heures auant  
disner. Ceux, qui auront plus de com-  
modité, pourront au lieu de cela, pren-  
dre vne once de casse, ou deux onces  
de manne vne heure deuant disner. Je  
trouue bon l'vsage des remedes cor-  
diaux : Mais le pauvre peuple souuent  
abusé en l'vsage, & sous ce mot de cor-  
diaux, ausquels il a recours, neglige les  
remedes de la preservation, principaux  
& necessaires, qui gisent a chasser l'hu-

meur, qui peut receuoir ou engendrer ceste grande & insigne pourriture, qui fait ceste maladie. Il faut donc auant toutes choses se seruir des remedes, qui espuisent les mauuaises humeurs, & puis auoir recours a ceux, qui peuuent alterer & changer la mauuaise temperature, & fortifier les parties nobles cōtre ceste grande pourriture.

Les remedes, que nous appellons Cardiaques, sont internes, ou externes. Pour les internes, le menu peuple se peut seruir de vray Mithridat, qui est fort recommandable pour son antiquité: pour l'autorité, qui luy a esté donnée par ce Prince, qui l'a inuenté, & en a souuent vsé: pour estre fort aisé a preparer, peu mixtionné, de peu de fraix, & de grande efficace. Cneus Pompeius aptes la defaite de ce grand Roy Mithridates en trouua la recepte en vn sien cabinet, escrete de la main de ce Prince, laquelle il tenoit parmy les choses plus pretieuses. Aucuns ont voulu dire, que Pompeius ne fist pas grand estat de ceste recepte, pour estre cōposée de peu de simples, & fort vulgaires.

*Antidotus verò multis Mithridatica fertur*

*Consociata modis, sed Magnus scrinia Rei-  
gis*

*Cum raperet victor, vilem deprendit in illis  
Synthesin, & vulgata satis medicamina  
risit.*

*Bis denum rutæ folium, salis & breue gra-  
num,*

*Iuglandésque duas totidem cum corpore fi-  
cus:*

*Hæc oriente die parco conspersa Lyæo*

*Sumebat metuens, dederat qua pocula tu-  
ror.*

Ceste recepte estoit composee de deux noix seches, de deux figues de cabats, de vingt feuilles de rüe broyees ensemble, avec vn grain de sel: Et portoit la-dicte recepte, que quiconque vseroit a ieun de ceste composition, seroit as-seuré de venin, & de poison pour vingt & quatre heures. Ceste composition peut seruir pour trois ou quatre mati-nees, & puis la reiterer, côme on voul-dra, & prendre apres vn peu de vin blanc, pour ceux, qui ont accoustumé d'en boire le matin.

Ceux, qui ne pourront se seruir de ce remede vseront les matins, auant que sortir de la maison, de l'Opiate suiuate:

℞. *conseruarum buglossi, borraginis, nenupharis & rosarum an. ʒ. ij conserua caleudula. ʒ. x. Malaxa cum syrupo de limonibus, & fac Opiatam : De qua utatur mane ad quantitatem nucis auellanae, superbibendo parum vini albi.*

Ceste opiate est bien temperee, qui ne peut eschauffer, ni apporter aucune incommodité, mais est fort bõne, profitable, & telle, que les apoticairees charitables la donneront au petit peuple a pris raisonnable : On en peut prendre la grosseur d'une noisette, avec vne cuilleree de vin blanc pour ceux, qui ont accoustumé d'en boire.

Quant aux Cardiaques externes, ie ne puis estre de l'opinion de quelques sçauans medecins, que i'honore pour leur suffisance, qui ordonnent de porter sur le cœur vn sachet d'Arsenic : alleguans pour raison, que l'Arsenic par sa vertu exsiccatue desechel'humidité pourrissante, & pour experience, l'exemple du Pape Adrian sixiesme, qui pour precaution de ceste maladie se seruoit de ce remede. A quoy il est aisé de respondre, que l'Arsenic desseche a cause de sa chaleur immoderee, & funeste: &

qu'il n'y a en l'vſage de ce poiſon aucune ſeureté, qu'un bon medecin ſe doit toujours propoſer : Que la ſeule experience du Pape Adrian, ou d'autre, ne peut valablement conclure, que ce moyen l'ait preſervé de la peſte : Que j'ay pour la deſſenſe de mon opinion l'autorité de Meſſieurs mes collegues reconnus pour Medecins treſſuffiſans, qui avecques bõne raiſon ſont de meſme aduiſ, & ont par longue experience remarqué les mauuais effets de ceſte drogue, pour auoir veu aucũs de ceux, qui en ont vſé, auoir depuis eſté ſubiets au battement de cœur, autres decedez auant leur vieilleſſe, eſquels on a trouué le cœur ſec & fleſtri : Entre autres ils aſſeurent, qu'un gentil-homme, qui portoit ſur le cœur ce poiſon pour precaution de la peſte, alla iouer à la paulme, où il tõba mort toutſoubdain, lequel ayant eſté ouuert fuſt trouué auoir le cœur ſec, noir, & vlcéré : Auffi eſt-il vray ſemblable, que le cœur eſchauffé ait attiré a ſoy ce poiſon, qui par l'aduiſ de tous les medecins eſt chauld au plus hault degré, cauſtique, & comme poiſon, ennemi mortel du

cœur. Je ne sçay, qui pourroit auoir introduict cest erreur, si ce n'estoit, que quelqu'un eust tiré ceste recepte des Arabes, & que par ignorance de la langue, ou ayant trouué ce mot Darfeni, qui en Arabe signifie canellé, eust pris ce mot pour le poison, que nous appellons Arseni, & de la eust faist vne pouldre d'Arfeni au lieu d'une pouldre de canelle pour porter sur le cœur, dans vn sachet. Lequel erreur auroit depuis esté suiuy, & defendu par aucuns sçauãs Medecins, comme aujourd'huy toutes propositions sont quasi problematiques en Medecine. I'honore leur suffisance: mais ils me pardonneront, si ie ne puis estre de leur aduis, & me permettront le mien libre, qui est, que nous ferions vn œuvre charitable, & digne de nous, si nous pouuions oster ceste opinion erronnee, qui est de dangereuse consequence, pour beaucoup de considerations.

L'usage du vif argent me semble aussi pouuoir apporter quelque nuisance par sa mauuaise qualité, non toutefois si dangereuse, que l'Arfeni. Je pense, que c'est vn abus populaire de  
aucune-

s'en seruir pour la precaution de la peste.

Nous auons dict cy deuant, que les mauuaises odeurs ne nous semblent aucunement bonnies pour Antidote de la peste. Car puis que les esprits sont recreez & reparez par les bonnes odeurs, il est bien-vraysemblable, qu'ils sont aisément offensés par les mauuaises senteurs. Si le peuple se veut seruir de ce remede, il me semble, qu'il ne sera point inutile, moyennant que ceste senteur soit si douce, qu'elle n'enteste point, qu'elle n'emplisse point, & n'eschauffe point le cerueau, ains le fortifie, recree & repare les esprits animaux & vitaux par sa douceur & souëfucté. A ceste fin le peuple pourra porter vn petit bouquet d'œillets, ou vn orange, ou vn citron.

Si quelqu'vn plus curieux se veut seruir d'vn sachet, ou escusson a porter sur le cœur, il pourra vser de la poul-dre suiuant, qu'il aura a pris fort raisonnable.

*℞. rosarum rubrarum siccarum, florum. violarū, buglossi, melissæ an. ʒ. s. santali citri-ni ʒ. iiij. myrrhæ, thuris, ligni aloës, & ligni*

*Rhodij an. 3. f. corticis citri, 3. ij. Omnia contundantur, puluerisentur, & includantur inter duos syndones interbastatos ad formam scuti, pro regione cordis.*

Entre les remedes laxatifs & cordiaux ie n'ay point parlé de rheubarbe, de syrop de cichorec composé avec rheubarbe, de musque, d'ambre gris, de perles d'or, de Coral, de Licorne, de Bezoard, de Mithridat, de Theriaque, de confection d'Alkermes, de Hyacintho, d'eaües theriacales, Imperiales, des Marsépains, des mains de Chrest perlées, des pastes royales, des Condits cordiaux, ny d'infinis autres simples, & composez de grand pris, de grande efficace, & dont ie fais autant d'estat, qu'il est raisonnable. Ceste opulence de medecine, ceste abondance & variété de remedes doibt estre employee pour les riches, par l'aduis de leurs medecins, qui les choisiront, feront mesler & preparer, comme ils iugeront necessaire, ayans esgard a la maladie, qui court, a la saison, au temperament, a l'age, sexe de ceux, qui les appelleront, a la region, & a plusieurs autres choses considerables.



Quant a la curation ie n'y ay point voulu toucher, pource qu'il est fort dāgereux, de se regler seulement aux preceptes generaux de la curatiō, & chauffer, comme on dict, toutes personnes a vne forme. Les Iurifconsultes disent, que *Theoriæ generales non bene informant animum practicum, qui consistit in singularibus.* Si ceste proposition est vraye en droict, elle doibt auoir plus de lieu en la medecine, & sur tout en ceste maladie. Car elle chāge, comme vn Protee. La peste ne se trouue quasi iamais semblable, qu'en vne chose, que la plus grande partie de ceux, qui en sont malades, en meurent. Nous tenons, qu'il y a presque autant d'especes de maladies pestilentes, que d'annees, esquelles elles affligent le pauvre peuple. Partant il faut varier la curation selon la diuersité de ceste maladie, de sa cause, & des diuers accidens, qui l'accompagnent, & auoir esgard, comme nous auons dict, a la saison, a la region, au sexe, a l'aage, au temperament, a la nature peculièr d'un chascun, & a plusieurs autres conditions, que le medecin doit considerer. Partant ce seroit vn grand

abus d'vser d'une mesme methode pour  
 guarir la peste. C'est pourquoy i'ay dict  
 par cydeuant qu'il se faut aider de bons  
 & prudens Medecins, & de Chirurgiés  
 bien experimentés pour la guarison de  
 ceste maladie. Ils ont assés de liures de  
 ceste matiere escripts par les anciens &  
 modernes ; Ausquels s'il se trouuoit  
 quelque default es maximes generales,  
 ou en la pratique particuliere du mal,  
 qui court a present, il sera amendé, & a-  
 bondamment parfourni par les escripts  
 de quelques doctes medecins de nostre  
 faculté, qui donneront volontiers ce  
 trauail a la santé publique.

Je n'ay point voulu en ce petit traité  
 recercher curieusement vn amas & mes-  
 lange de drogues, ains me suis conten-  
 té de choisir les plus simples remedes,  
 en petit nombre, & de moindre pris,  
 vtiles toutesfois pour la precaution de  
 la peste, pour le soulagement & conso-  
 lation des pauures, en faueur desquels  
 i'ay dressé cest aduis comprenant quel-  
 ques preseruatifs generaux, qui doiuent  
 estre generalement & tousiours em-  
 ployez en toutes sortes de peste, pour  
 ce qu'ils combattent la nature vniuer-

felle de la peste, de quelque cause, qu'elle puisse venir. Telles sont les regles, tât celles, qui sont ordonnees par le magistrat politique, que celles, que chacun doit garder en son particulier, cy deuât mentionnees, & autres semblables, que l'on y peut adiouster. En ce nombre ie comprendray pour la conclusion de ce discours deux souuerains antidotes, dont on se peut seuremēt seruir en toutes sortes de peste pour la precaution.

L'vne est l'vsage du vin, qui par sa subtilité passe fort aisément, & par sa force restaure promptement les esprits, conforte le cœur, & les autres parties nobles: ie le tiens par l'adujs de nos anciē & plus excellens Medecins de ceste eschole, desquels i'honore la memoire & la posterité, pour vn souuerain cardiaque: Ils l'appelloient *Cardiacum Cardiacorum*: & tel ie l'ay experimenté pour m'auoir par la bonté de Dieu serui seulement par la uemēt, plus que n'eussent faict quelques autres, qui sont recommandés par leurs qualitez occultes. L'vsage en doit estre moderé, & se trouuera fort vtile tât pris par dedās, qu'appliqué dehors pour le lauement des

maines, & du visage, spécialement à ceux, qui ont accoustumé d'en vser, & encores à toutes personnes, ausquelles pour vne plus particuliere circonstance il n'est point defendu.

L'autre antidote est l'electuaire, que l'on appelle *electuarium de tribus aduerbiis*: *Cito, longè, tarde, tost, loin, tard* : C'est à dire, se retirer bien tost du lieu infecté, aller bien loin, & reuenir tard: d'ot on a faict ce petit distiche.

*Hæc tria tabificampellunt aduerbia pestem,  
Mox, longè, tardè, cedè, recede, redi.*

Ceste cõposition a esté faite par l'aduis du grand maistre, qui a dit, n'y auoir point de plus excellēt remede aux maladies, qui viennent de l'indisposition de l'air, que le changement d'air, & de lieu. Son truchement Latin donnant quelques preceptes pour la precaution de la peste a cõmandé de voyager. Les anciens bastissoyent tousiours le temple d'Esculape dehors les villes, pour nous donner à entendre, que l'air des champs est tousiours plus salubre, que celuy des villes. L'an 1580. la ville de Paris fust abandonnee de la plus part des personnes de qualité & de moyës,

qui se retirèrent aux champs, à cause de la violence de la peste, qui persecuta fort les habitans. Graces à Dieu, nous n'auons encores aucun signe, qui conclue necessairemēt à vn euenemēt si sinistre, comme il a esté dict cy deuant. Ce cas aduenant, dōt Dieu nous veuille garder, le souuerain preseruatif pour ceux, qui auroyent commodité d'en vser, seroit de se retirer bien tost en vn air salubre, & reuenir seulement, quand Aquilon le balay du monde auroit nettoyé ces ordures, & chassé de la ville toute la corruption, dont elle auroit esté souillée. Ceux, à qui ces moyens-là manqueroient, ou qui autrement seroient necessitez de demeurer en la ville, se pourroyent seruir des regles cy deuât mētionees, & des remedes qui particulierement leurs seroient ordonnés par leurs Medecins. Mais sur tout ils auroient à se souuenir de ne frequēter aucunement les lieux infectez, ny les personnes commises pour traicter, solliciter, garder ou assister les malades. Ce n'est pas icy, qu'il se faut monstrier vaillant, ny aller des premiers à la charge, ains se tenir à l'arriere-garde, voire

pluſtoſt au bagage, loing des coups, & porter, pour deuſe le mot du ſoldat Comique, *Hic ero poſt principia.*

Amy Lecteur, le bõ Dieu vous veuille preſeruer, & nous auſſi d'vne maladie ſi funeſte, & conſeruer en ſanté: Prenez en bõne part ce petit aduertiffement, & *Candidus imperti meliora, vel utere noſtris.*

A Paris ce douxieſme de Iuillet l'an  
1606.

F I N.

